

nochkomen lazzin hengin an arge an dissin bryff, der gegeben ist noch gotis gebort dryezen hundirt iar dar noch in dem sybin vnde achezigistin iare an der nestin mitwochin vor sente Margarethyn tage der heyligin iuncfrouwin.

Nach dem Orig. im K. Haupt-Staatsarchiv zu Dresden. Das an einem Pergamentstreifen befestigt gewesene Siegel ist abhanden gekommen.

No. 60. 1387. 28. Nov.

*Bürgermeister und Rath erklären, dass sie auf Befehl des Markgrafen Wilhelm dem Landgrafen Balthasar, jedoch unschädlich der Leibgedings-Verschreibung (No. 59) die Erbhuldigung gethan haben.*

Wir nochgeschrybin Nickyl von der Heyde burgermeystir, Pecz Schroter, Hensyl Kramer, Albrecht Cappelndorf, Gotfryd Frydrich, Eckylman, Hannus Hutirmayt, Hannus Lozeman, Nickyl Ahorn, Hannus Gebisch, Hermanchin vnde Hyllinge ratlute der stad zcu Mizsin vnde dy gancze gemeyne arm vnde rych do selbins zcu Mizsne bekennen offinlichin vor vnz vnde vor allen vnsern nochkommen, daz wir von gebote vnde geheys des hochgeborn furstin hern Wilhelmis marcgrafen zcu Myzsin vnde langrafen zcu Doringin vnser lybin gnedigen herren dem houchgeborn furstin hern Balthazar langrafen zcu Doryngin vnde marcgrafen zcu Mizsin vnser lyben gnedigen herren vnde synen rechtyn lehens lybis erbin eyne rechte erphuldunge gethan haben also, gesche is daz vnser lybir gnediger herre her Wilhelm obgenant abginge mid dem tode vnde rechte lybis lehens erbin hindir ym an dem lebin nicht enlysse, des got nicht enwolle, daz wir vnz denne an den obgnantin vnsern gnedigin herren hern Balthazar vnde an syne rechte lyebiz lehenz erbin haldyn vnde sye vor rechte herren habin vnde gehorsam sin sullin vnde wollin noch lute der bryffe, die vnser gnedigin herren vndir enandir darubir gegeben habin, doch vnschedelichin der huldunge dy wir der hochgeborn furstin frouwin Elizabeth marcgrafin zcu Mizsin vnser gnedigin frouwin zcu yrem lipgedinge gethan habin, der wir gewartin sullin zcu eyne lipgedinge alle dy wile sie lebit noch lute yrer bryffe, dy sy von den obgnantin vnsern gnedigyn herren darubir hat, daz ane vnz diese huldunge dy wir vnserm gnedigen herren ern Balthazar vnde synen rechtin lybiz lehenz erbin gethan habin keynen ynfal noch schadin brengin sal. Des zcu orkunde habe wir vnser stad ingesigil an diesin bryff gehangin. Gegeben noch Cristi geburthe dryezenhundirt iar an dem sybin vnde achezigistim iare an dem nestin dornstage noch sente Katheryn tage der heyligin iuncfrouwin.

Nach dem Orig. im K. Haupt-Staatsarchiv zu Dresden mit dem Stadtsiegel an einem Pergamentstreifen.